

Sanaartornermi neqerooruteqartitsisarneq pillugu Inatsisartut inatsisaata allanngortinneqarnissaanik Inatsisartut inatsisissaattut siunnersuut
(Ineqarnermut, Attaveqarnermut Angallannermullu Naalakkersuisoq)

**Saqqummiussissut
Siullermeerneqarnera**

Naalakkersuisut sinnerlugit matumuuna sanaartornermi neqerooruteqartitsisarneq pillugu Inatsisartut inatsisaata allanngortinneqarnissaanik Inatsisartut inatsisissaattut siunnersuut saqqummiuppara.

Neqerooruteqartarnermut inatsimmi aammalu taanna naapertorlugu peqqussusiani maleruagassat pitsaanerusumik atuutsinneqarnissaat siunnersuuteqarnermi siunertaavoq.

Sanaartornermi neqerooruteqartitsisarneq pillugu Inatsisartut inatsisaat – ulluinnarni neqerooruteqartarnermut inatsimmik taaneqartartoq – 1. januar 2010-mi atuutilerpoq. Neqerooruteqartarnermut inatsit naapertorlugu Neqerooruteqartitsisarnermut Maalaaruteqartarfik 1. juli 2010-mi pilersinneqarpoq.

Maalaaruteqartarfiup pilersinneqarnerata kingorna maalaaruteqartarfiup sulinera aalajangiisinnaatitaaffiilu pillugit erseqqissaateqarnissaq siunertaralugu neqerooruteqartarnermut inatsimmi aalajangersakkani iluarsiiisuteqarnissaq pisariaqartoq naliliisoqarpoq.

Tassalu Maalaaruteqartarfiup inatsisit unioqquutillugit aalajangiinernik atorunnaarsitsisinnaanissamut aammalu neqerooruteqartitsinernik inatsisinik naapertuuttunngortitsinissamut piginnaatinneqarnissaa pisariaqartinneqartoq paasinarsisimavoq. Taamatuttaaq Maalaaruteqartarfiup suliani pingaarutilinnik tunngaveqanngitsuni aalajangiisinnaanissamut piginnaatinneqartarnerata pisariinnerulersinneqarnissaa paasinarsisimavoq. Maalaaruteqartarfiup suliassanik isumaginnittarnerata pitsanngorsarneqarniarnerani piffissap suliassanik isumaginninnermut atorneqartartup sivikillisinneqarnissaa siunertarineqarpoq.

Tamatuma saniatigut inatsisissatut siunnersuutip aalajangersagaq, ”Kalaallit Nunaanni sanaartornermi suliaqarnermut pilersuiner mullu ataatsimoortumik piumasaqaatit” (AP) atorneqarnissaannut erseqqissaaffiusoq imaraa. Tassalu tassani inatsit nutaaq pineqanngilaq, taamaallaalli suleriaatsip atuutereersup ingerlateqqinneqarnissaata inatsisissatut siunnersuut manna aqqutigalugu erseqqissarneqartussatut naleqqutsinneqartoq matumani pineqarpoq.

Pisortat ukiut tamaasa sanaartornermut annertuunik aningaasaliisarput, taamaattumillu suliassaqarfiup nalinginnaasumik eqqumaffigineqarnera pissusissamisuginnarpoq. Naalakkersuisut ineriartorneq malinnaaffigaat, aammalu suliassaqarfimmi pitsanngorsaaqqinnissat iluarseeqqinnissallu pisariaqartinneqarnersut ingerlaavartumik isumaliutigisarlugu.

Maannakkorpiaq pisortat sanaartugassaataannik aammalu sanaartugassanik pisortanit tapiiffigineqartunik neqerooruteqartitsinermi inuiaqatigiit aningaasaqarnerat eqqarsaatigalugu nukittorsaanissanik suliniuteqarnissaq Naalakkersuisut sulissutigaa – taassumalu ataani ilaatigut aamma suliffiit ilinniarfissat siuarsarniarlugit suliniutinik ingerlatsillutik. Ukiup ingerlanerani kingusinnerusukkut – Naalakkersuisut sinnerlugit – tamatumunnga siunnersuummik aalajangersimasumik Inatsisartunut saqqummiussisinnaassallunga pilersaarutigaara.

Siunnersuutip aappassanneerreqannginnerani Inatsisartut Attaveqaqatigiinnermut Ineqarnermullu Ataatsimiititaliaanni suliarineqarnissaa Naalakkersuisunit inassutigaarput.

Taamatut oqaaseqarlunga sanaartornermi neqerooruteqartitsisarneq pillugu Inatsisartut inatsisaata allanngortinneqarnissaanik Inatsisartut inatsisissaattut siunnersuut Inatsisartuni suliarisassanngorlugu tunniuppara.